



**Programma veur de carnaval 1966**

Wè gève noe 't programma omdèt bije ei fieëst ei programma heürtj. Dit programma gève wè auch nog opdèt djer 't te gooj oettrain zultj hõje.

Zunjig, moandjig en deesdig is inne zaal danse op muziek. Wie altied van ei hieël bekindj orkest. Doa weurtj mèt begostj om half zès. Moandjig begintj òm twieë ore de optocht bije de „Prairi”. (Sjrief dèt noe auch op in eure agenda).

De roette die gevolgdj weurtj is als volgtj. En noe neet wèes zeen en anges òm dreije. Dèt ter nog neet mieë noew stroate biezen, kinne wè auch neet helpe. Doa môdjer anger minse mer nut veur aan kieke.

Sebastiaanstroat, Kruuspuntj, Antoniusstroat, Brandjvinstroat, Engerstroat, Hoeëgstroat, Kruuspuntj, Niesstroat, Scheyvenstroat, Kunne koel en de Seringestroat as ze verhaardj zeen. Luytenstroat, Sebastiaanstroat.

**De volgorde vanne optocht as volgtj:**

1. Ruitersklub
2. Engerstroat
3. Hoeëgstroat
4. Sebastiaanstroat
5. Ellerhei, Brandjvin- en Antoniusstroat
6. Fomfaar „Ellona”
7. Prinsewage

Losse groepe wère verzòchtj bije de wages van heur eige buurt te blieve en estebleef bije den troep blieve tot det de optocht is aafgelaue. De pelisie zal ei eugske in het zeil hõje.



PRINS CORI (1966)

**Moeërebuuk en Moeërinnekes,**

De carnaval steit weer veur de deur. As Prins hõb ich de zekerheid det dit veur uch weer daag wère om noeëts te vergète, as ich dan mer op eur aller mètwerking maag rekene. Dan wil ich noe doon waat ich eigelik oppe ieste plaats haaj môtte doon, namelijk, de Vorst en de road van elf bedanke veur ut vertrouwe det ze in mich gesteldj hõbbe door mich as Prins te keze veur 1966, en drie daag te moge regere euver oos moeërelandj. Verder dank ich bije veurbaat de prinsekapel die aug dit joar weer bereidj is òm de carnaval loester bije te zètte. Aug dit joar zal weer eine optocht door oos dõrp trèkke, en ich hoop same mèt de vorst en de road van elf detter weer maag zeen as veurgoande joaren. Al die minse die aan den optocht mèt wirke of der aan bije drage miene gemeindje dank. Mèt trots kinne wè zègge det de optocht in oos dõrp de kroen spintj euver al die anger dõrpe inne gemeindje al joare achter ein. Moeërebuuk, hõje zoe ! Mèr auch inne zaal hope wè detter weer stumming in zal zitte, zoe auch inne cafées en oppe stroat. Doarom doon ich speciaal ei beroop oppe ôjer generasie, om der mèt die daag ins oet te komme en good mèt te doon. Sjaamt uch veur nemes. Auch de jeugd wil ich verzeuke òm as noeët te veure mèt te doon, zoeedet ooze carnaval zal wère òm noeëts te vergète.

Moeërebuuk alaaf !

ELL STEIT WEER PARAAT !

**Aafsjeidweurdje van Prins Lewie I**


Als sjeiende prins 1965 wil ich toch nog waat zègge, veur ich de sleutel aan miene opvolger gèef. Oppe ierste plaats dank ich uch allemaol veur de mètwerking, auch namens de road van elf enne vorst. Oppe twieëde plaats wil ich uch aanspore om auch de noewe prins mèt veul entusiasme te begroete, en det neet allein, mer hum auch mèt daden bie te stoan, dan zal de carnaval enne optocht weer zeen zoeë wie wè hum altied gewindj zeen. Ei bitje greüts moge wè waal zègge det het veurig joar in Ell tiejes de vasteloavendj weer good toeve waas. De optocht waas van die gehaltje dèt wè allemaol kinne zègge: „De Moeërebuuk die kinne der get van”. Moeërebuuk stèltj miene opvolger en uch zelf neet teleur. Begintj vandaag nog !

Moeërebuuk alaaf,

PRINS LEWIE I (1965)



KENNERS



MAES



**'t Ging neet door**

Bert woelij eine wage kaupe en vrogg waater mosdije koste. „Twieë hongerd gulje”, zag dè gérazjehójer. „Dèt is neet veul”, zag Bert, „mer dan zal der auch waal neet hell laupe !”. „As det ze hiej òm half zeve wèg riedst, konse om zeve ore in Injhove zeen”, zag de gérazjehójer. „Wazus mins”, zag Bert, „doa môt ich ins met oos Merie euver kalle, ich bin drek trök”. „Het geit neet door”, zag Bert wie der trök kwaam, „oos Merie zag zoeë: waat môst tich om zeve ore in Injhove”.